



Saopćenje

Pred lokalne izbore: Tužilaštvo i Izborna komisija intenzivirali saradnju Održan sastanak na temu zaštite izbornog procesa

(Brčko, 12.9.2024. godine)

U cilju unapređenja zaštite izbornog procesa juče je u Brčkom održan radni sastanak predstavnika Tužilaštva Brčko distrikta BiH i Izborne komisije Brčko distrikta BiH. Na sastanku posvećenom ključnim aspektima zaštite izbornog procesa, iz ugla nadležnosti dviju institucija, potvrđena je spremnost za nastavak uspješne saradnje na zaštiti biračkog prava i slobode odlučivanja birača. Sistemski odgovor na izborne nepravilnosti, inicijative, rješenja i kampanje protiv svih vidova krivotvorenja izborne volje građana u fokusu su rada lokalnih institucija.

Tematskom sastanku, čiji je domaćin bila Izborna komisija Brčko distrikta BiH, a kojem su prisustvovali glavni tužilac Zekerija Mujkanović i tužilac Pavo Radoš, te predsjednik Izborne komisije Marko Tadić i članice Ljiljana Orendi i Alenka Stojaković Đukić, razmijenjene su ključne informacije o kapacitetima za međuinstitucionalnu podršku, pomoć i saradnju. Još jednom je potvrđena važnost čvrste saradnje i uključenosti svih nadležnih aktera u zaštitu izbornog procesa prije, tokom i nakon izbornog dana, uključujući prije svega nadležne institucije, ali i nevladine organizacije, medije i građane. Učesnici sastanka su saglasni da se partnerskom saradnjom, kao i otvorenim odnosom prema javnosti, može unaprijediti efikasnost u zaštiti temeljnih društvenih vrijednosti, kakve su nesumnjivo puna vladavina prava, odnosno zakonito provedeni izbori, kao temelji demokratije.

Intenziviranjem i konkretiziranjem saradnje sa svim partnerskim institucijama, Tužilaštvo potvrđuje potpunu posvećenost borbi protiv izbornih prevara, djelujući kao dio šireg tima u ostvarivanju vladavine zakona. Za izborne prevare počinjene na prethodnim lokalnim izborima pred pravosuđem Distrikta osuđen je veliki broj osoba iz političkog miljea, među kojima su skupštinski zastupnici i drugih javni zvaničnici, kao i predsjednici političkih partija i brojni stranački aktivisti. Najčešće su procesuirani za krivična djela: Pripremanje krivičnog djela i Udruživanje radi počinjenja krivičnog djela u vezi s krivičnim djelom Prijevара pri glasanju, te za krivična djela Povreda slobode odlučivanja birača i Davanje i primanje dara ili drugog oblika koristi za trgovinu uticajem. Najčešći načini izvršenja ovih krivičnih djela bili su: pribavljanje kopije ličnih dokumenata trećih osoba i njihovo lažno prijavljivanje za glasanje van BiH, nuđenje na prodaju i direktna kupovina glasova, kao i nuđenje raznih usluga od strane visokopozicioniranih zvaničnika za pribavljanje glasova ili kopija dokumenata trećih osoba.

Tužilaštvo je već ranije odredilo tužioca Pavu Radoša, iz Odsjeka za organizirani kriminal, privredni kriminal i korupciju, kao kontakt tačku za saradnju na zaštiti izbornog procesa. Na dan izbora, 6. oktobra 2024. godine, Radoš će zajedno s dežurnim tužiocem, osigurati koordinaciju prijema prijave krivičnih djela izbornih prevara i postupanje Tužilaštva u daljnjem toku procesuiranja izbornih nepravilnosti. Tužilaštvo zahvaljuje građanima i istraživačkim medijima na dosadašnjoj saradnji s nadležnim institucijama u otkrivanju krivičnih djela u vezi s provođenjem izbornog procesa. Zajedno s Policijom Brčko distrikta BiH i Izbornom komisijom, pozivamo sve društvene aktere da i ubuduće prijave svaki slučaj protivzakonitog uticaja na izbornu volju građana ili bilo koju drugu izbornu nepravilnost za koju saznaju.

**GLAVNI TUŽILAC
ZEKERIJA MUJKANović**

